



Mahein Nia Lian Nú. 60, 03 Outobru 2013

Forma Foun Operasaun Krime Organizadu iha Timor-Leste

Introdusaun

Iha Agustu 2013 Fundasaun Mahein (FM) alerta dahuluk tiha ona kona-bá operasaun krime organizadu iha Timor-Leste. Grupu krime organizadu hahu rekruta ema ho númeru boot no involve joven sira. Relatoriu simples ida la iha atensaun husi autoridade siguransa, liu deit semana hirak nia laran mosu insidenti ida grave tebes iha kapital Dili, halo comunidade pániku no tauk la'o sai iha tempu kalan.

FM nian monitorizasaun krime organizadu nia operasaun ho tipu foun ne'ebé kontinua rekruta Timor oan ne'ebe partisipa iha atividade ilegal dadaun ne'e maka'as tebes. Sidadaun Timor-Leste ne'ebé mai husi *back ground* oin-oin rekruta sai membru krime organizadu iha biban ne'ebé inflasaun ekonomia halo sira moris kiak. Grupu comunidade sira ne'ebé krime organizadu konsege rekruta maka sira balu iha institusaun Governu nia laran, taksista sira, membru gen, autoridade guarda fronteira sira balu, nune'e mos individu balu iha aero portu ka portu sira iha Timor-Leste.¹

Presenza krime organizadu ne'ebé númeru ho asaun komesa aumenta. Objetivu krime organizadu iha Timor-Leste ne'e atu hadau osan ka asaltu ema nia sasan, violasaun seksual ho tan omesidu ka oho. Violasaun seksual hasoru fetu ida iha Embasada Amerika nia oin nune'e mos hasoru fetu ho mane ida iha Tasi Tolu hodi obriga sira halo relasaun seksual depois halo filmagem ne'ebé dadaun ne'e akontese. Volume violensia mosu bebeik involve Timor oan sira sai autor nune'e mos sai mos vitima.²

Ekonomia iha Timor-Leste sa'e maka'as hodi halo Timor oan sira ladun iha biban boot hetan servisu no oportunidade diak ba sira nia kareira iha sira nia kna'ar. Inflasaun ekonomia hamoris tan dezempregu ne'ebé boot, nune'e mos vensementu kiik ba funsionariu publiku sira, menus kontrolu ba atividades ilegal, nune'e fo biban barak ba malisan atu partisipa iha krime organizadu hetok boot liu hodi atraku Timor oan barak ne'ebe laiha biban atu ses an.

Insentiva saida mak bele uza atu Timor oan sira buka moris ho onestu, wainhira krime organizadu rekruta sira atu partisipa iha atividade krime organizadu ne'ebé hetan lukru diak liu?

¹ Fundasaun Mahein (2013). Krime Organizadu: Rekrutamentu Ba Ema Sivil Ho Numeiru Boot. Dili <http://www.fundasaunmahein.org/2013/08/15/organized-crime-increases-civilian-recruitment/>

² Fundasaun Mahein (2013). Krime Organizadu: Rekrutamentu Ba Ema Sivil Ho Numeiru Boot. Dili <http://www.fundasaunmahein.org/2013/08/15/organized-crime-increases-civilian-recruitment/>

Karik Governu la dezenvolve kona-bá lalaok prevensaun no kombate kauza Timor oan sira nia involvimentu ba atividade krime organizadu maka problema sei lahotu hela deit.³

Metodolojia ne'ebé adopta iha peskiza ne'e hodi rekolla informasaun sira kona-bá operasaun krime organizadu iha Timor-Leste. Liu husi diskusaun iha ekipa peskiza FM nian ho modelu *Security Sector Discussion* (SSD), intervista ho fontes FM nian, observasaun ba violensia sira ne'ebé akontese, inklui rekolla informasaun sira husi públikasaun media nasional. Pontu análise husi relatoriu ne'e maka operasaun grupu krime organizadu ho forma operasaun oho ema iha kapital Dili, asaltu sira iha kapital Dili ho forma hadau ka kobransa ilegal no violensia seksual, ikus liu públikasan filmajen no fotografia sira nia tendensia halai ba pornografia.

Operasaun Grupu Krime Organizadu

1. Operasaun Grupu KIBATA no MONSTER⁴ iha 24 Setembru 2013

Mosu insidenti ida ne'ebé grave tebes iha loraon 24 Setembru 2013 ne'ebé sei manas hela iha komunidadade nia kakutak no sai diskusaun públiku iha sosiedade nia leet no aktu ne'ebé traumatiku tebe-tebes. Autor na'in rua ho motor ida iha minutu balu nia laran, sona joven ida mate iha Marconi no hakanek na'in rua iha area Kampung Alor no Fatuhada.⁵

Informasaun ne'ebé FM asesu kronolojia antes akontesementu, suspeitu ho nia kolega sira hemu tua iha "J" nia uma Lurumata - Comoro. Suspeitu nia kolega ho inisial "O" maka sosa tua, informasaun ne'ebé FM asesu deskonfia "J" kahur droga ho tua no fuma mos *ganja*. Depois ida ne'e suspeitu ho nia kolega sira sadik malu atu ba oho ema. Nune'e suspeitu ho nia kolega ida ho motor sai ho sona kanek no tá mate vitima balu iha parte Kampung Alor, Marconi no Fatuhada.

"J" deskonfia nu'udar bandar droga ida iha kapital Dili ne'ebé iha relasaun ho grupu bandar droga Indonezia nian. Fontes ne'ebé FM asesu katak "J" sai hela deit ba Indonezia no "J" nia fen ema Indonezia maibe "J" sai bebeik la iha objetivu ne'ebé klaru. Konfirma mos katak "J" nu'udar distributor ropa obralan iha kapital Dili. Familia ida husi suspeitu nian esplika katak suspeitu durante hanesan ema tauk ida no iha uma deit derepenti deit oho ema no sona kanek ema barak, familia suspeitu deskonfia antes suspeitu oho ema, dalaruma sira hemu tua kahur ho droga.⁶

Hafoin kapturasaun suspeitu na'in rua, investigasaun PNTL deskonfia suspeitu na'in rua hemu uluk droga depois kontinua oho ema. Komadante Operasaun PNTL Superintendenti Xefe

³ Fundasaun Mahein (2013). Krime Organizadu: Rekrutamentu Ba Ema Sivil Ho Numeiru Boot. Dili <http://www.fundasaunmahein.org/2013/08/15/organized-crime-increases-civilian-recruitment/>

⁴ MONSTER – *Moris Tenki Hasoru Terus*. KIBATA – *Kipas Dulu Baru Tanya*.

⁵ Suara Timor Lorosa'e (STL) – Online (2013). Kazu Marconi, Hamate Joven 1 No Hakanek nain 2. <http://suara-timor-lorosae.com/kazu-marconi-hamate-joven-1-no-hakanek-nain-2/>. Asesu iha loraon 30 Setembru 2013

⁶ A. C (2013, 26 Setembru). Intervista Pesoad

Armando Monteiro hato'o iha media nasional katak polisia investigasaun sei halo teste urine hodi konfirma suspeitu konsumu duni droga ka lae?⁷

Monteiro mos konfirma, PNTL identifika ona grupu sira ne'ebé maka durante ne'e tenta mobiliza ema hodi halo krime iha kapital Dili iha tempu loron no kalan hodi estraga estabilidade. Lokalidade grupu sira ne'e iha kapital Dili. Deskonfia suspeitu na'in rua involve iha grupu KIBATA no MONSTER ne'ebé oho ema iha Marconi no hakanek na'in rua seluk iha Kampung Alor no Fatuhada.⁸

PNTL identifika mos grupu KIBATA no MONSTER nia membru hamutuk 200 pesoas espalla iha Dili Iaran.⁹ Maske grupu rua ne'e sai hanesan tarjetu operasaun PNTL nian no tau hanesan prioridade no bele hola medida prevensaun. Maibe medida prevensaun saida maka ita prezisa hodi halo intervensaun ba situasaun ida ne'e?

Membru balu husi grupu KIBATA no MONSTER iha ona investigasaun PNTL nian no identifika rede husi grupu ne'e rasik. Investigasaun ida tenki profundo hodi identifika lolos grupu rua ne'e nia ezistencia, portantu nia forma organizadu no asaun planeadu. Se mak organiza? Se mak fasilita? No se mak iha grupu ne'e nia kotuk?

2. *Asaltu no ameasa iha area turistik no fatin públiku sira*

iha tinan 2010 to'o 2013 iha forma foun operasaun husi grupu organizadu sira iha kapital Dili. Aktu husi grupu organizadu ne'e ho nia forma asaltu hasoru joven sira ne'ebé tur ho nia namorada no namoradu iha fatin públiku no obriga sira pratika buat ne'ebé la ho sira nia konsensia no vontade rasik.

iha tinan 2010 nia rohan espalla fotografia balu ne'ebé iha fotografia ne'e rasik hatudu iha grupu balu kompleta ho katana ameasa no kaer joven sira ne'ebé tur iha ho nia namoradu no namorada iha area Kristo Rei nian no Dolok Oan.¹⁰

Tinan 2012 akontese mos kazu ida iha parte Kristu Rei – Dili nian husi siguransa sivil ne'ebé fo siguransa iha area Kristu Rei nian tenta asaltu joven ida ho nia namoradu tur iha fatin paseu nian maibe lakonsege kaer. Joven ne'e informa katak sira sente la seguru wainhira tur iha fatin públiku ho nia namorada ka nomoradu inklui kolega tanba iha deskonfiasa no presepsaun negativu husi ema seluk wainhira feto no mane tur hamutuk iha fatin ida.¹¹

Akontesementu seluk iha jardim Largo Lecidere iha Maiu 2013 wainhira joven ida ho nia namorada tur iha area jardim nian iha tempu kalan, grupu siguransa ne'ebé fo siguransa iha area refere tenta asaltu ho nia forma ameasa no duni sai husi fatin refere.¹² Fontes informasaun ne'ebé FM asesu ho inisial "L.J" esplika iha elementu siguransa jardim nian iha tempu kalan wainhira joven sira ne'ebé tur hamutuk

⁷ Jornal Diario Nasional. Segunda, 30 Setembru 2013.

⁸ Jornal Diario Nasional. Segunda, 30 Setembru 2013.

⁹ Jornal Timor Post. Segunda, 30 Setembru 2013

¹⁰ A. C (2010). Dokumentu A. C. Dili

¹¹ M. L (2013). Entrevista Pesoal. Dili

¹² B. J (2013). Entrevista Pesoal. Dili

Iha fulan Juñu 2013 joven ida ho nia namorada tur iha jardim Motael (Igreija Motael nia oin) mais-menus tuku hitu kalan, grupu ida hamutuk ema na'in tolu derepentente asaltu no ameasa. Fontes ne'ebé FM asesu katak grupu ne'e tenta ameasa hodi kaer lori ba polisia no tenta ameasa husu osan.¹³

Nune'e mos iha lora 24 Juñu 2013 media nasional fo sai katak joven fetu ida ho nia namorada tur iha tasi ibun Embaxada Amerika nian oin (Pantai Kelapa), grupu ida hamutuk ema na'in hat iha taxi lora tun ameasa nia namorada halai tiha. Grupu ne'e kaer joven fetu ne'e hatama ba taxi lora lori halai no halo relasaun seksual.¹⁴

Kazu hanesan relatoriu media nasional sira pública iha fulan Agustu 2013, grupu bandidu obriga fetu ida ho nia namorada halo relasaun seksual no hasai video, wainhira tur hamutuk iha area João Paulo, Tasi-Tolu nian.¹⁵ Komadante Servisu Investigasaun Kriminal Nasional konfirma katak kazu ne'e nia forma obriga ema halo video porno.¹⁶

3. *Públikasaun video no fotografia*

Iha tinan klaran 2013 sai preokupasaun husi entidade tomak iha Timor-Leste kona-bá publikasaun video no fotografia ne'ebé nia tendensia pornografia husi individu no karik husi grupu balu ne'ebé la iha responsabilidade iha media sosial hanesan facebook no portal anonim balu.

Sai diskusaun públiku iha sociedade Timor-Leste no iha media sosial hanesan facebook kestiona kona-bá publikasaun hirak ne'e. Pesol balu ne'ebé utiliza facebook ho identidade falsu pública video no fotografia iha grupu facebook sira. Maske hetan reazen maka'as husi entidade tomak maibe iha media sosial sira kontinua pública video no fotografia ne'ebé ninia tendensia pornografia.

Preokupasaun husi Deputadu Bankada Parlamentar sira iha kestiona kona-bá video no fotografia ne'ebé ninia tendensia halai ba pornografia. Opiniun públiku hatete presiza lei pornografia nian atu regulariza aktu hirak ne'e tanba ninia konsekuensia implika ba sociedade Timor-Leste ne'ebé halai ba violensia seksual.¹⁷

Iha relatoriu media nasional kestiona husi Sekretaria Estadu Promosaun Igualidade (SEPI) deklarata katak kazu violensia seksual ás iha Timor-Leste.¹⁸ Aktu hirak ne'e iha nia forma organizadu no asidental, fo risku maka'as ba fetu sira.

Iha tinan 2010 nia rohan espalla iha sociedade nia leet no media sosial sira fo sai fotografia balu ne'ebé hasai husi grupu organizadu ne'ebé asaltu joven sira wainhira tur hamutuk namora malu iha area Kristo Rei – Dili nian. Fotografia ne'ebé espalla hatudu katak grupu organizadu ho nia forma balu lori katana ameasa joven sira, ameasa hadau motorizada ne'ebé vitima uza,

¹³P. Z (2013). Entrevista Pesol. Dili

¹⁴Timor Post. Kuarta, 04 Setembru 2013

¹⁵Timor Post. Tersa, 06 Agustu 2013.

¹⁶Suara Timor Lorosa'e – STL. Tersa, 06 Agustu 2013

¹⁷Timor Post. (2013). Atividade prostituisaun buras, lei pornografia seidak sai preoridade. Dili

¹⁸Timor Post. (2013). Violensia seksual ás iha Timor-Leste. Dili

iha mos osan balu ne'ebé vitima entrega ba grupu ne'e no hasai mos fotografia hodi espalla iha comunidade.¹⁹

Iha tinan 2011 nia klaran espalla mos video balu ne'ebé nia tendensia halai ba pornografia iha sociedade nia leet. Iha video balu nia karakteristikada privadu maibe ema ka grupu balu tenta espalla ba públiku iha media sosial ne'ebé la iha ema ruma maka responsavel ba pratika ida ne'e. Video seluk nia forma iha intensaun atu halo video pornografia ne'ebé hatudu iha video ne'e rasik katak iha ema seluk hasai hela fotografia no video husi autor rua ne'ebé halo relasaun seksual.²⁰

Iha kazu seluk ne'ebé deskonfia husi elementu PNTL involve halo video porno iha tinan 2011, espalla iha públiku no media sosial sira hanesan facebook no portal anonim balu. Kazu ida ne'e sai preokupasaun husi entidade tomak iha Timor-Leste no la iha ema ruma maka responsavel ba públikasaun refere.²¹

Fraku iha Kontrolu no Regulamentu

1. Operasaun autoridade siguransa nian

Buat ida ne'ebé FM hetan iha nia monitorizasaun konkluir katak Komandu PNTL falla tiha ona iha planu operasaun nian. Portantu intervensaun ne'ebe akontese hafoin violencia. Maske alerta maka'as husi Komandu Jeral PNTL hasoru situasaun sira ne'e. Ida ne'e hatudu situasaun paniku ba comunidade no hatudu frakeza kapasidade instituisaun hasoru situasaun grave ruma.

Antes to'o tinan klaran 2013 husi lider polítiku sira, Komandu Jeral PNTL, F-FDTL no comunidade tomak preokupa kona-bá ezistencia grupu arte marsial ne'ebé sempre provoka konflitu no violencia iha teritoriu Timor-Leste tomak. Iha tinan 2011 Governu Timor-Leste liu husi Konsellu Ministru hasai rezolusaun ida hodi suspende atividade arte marsial maibe violencia kontinua akontese, oho malu iha rai laran lori to'o rai liur.

Provokasaun no situasaun konflitu sempre identifika ho grupu arte marsial, grupu joven sira halo violencia iha bairu comunidade, utiliza atributu arte marsial sira. To'o tinan klaran 2013 Konsellu Ministru hasai tan rezolusaun ida hodi taka atividade arte marsial iha teritoriu tomak.

Ezekusaun husi rezolusaun ida ne'e Komandu PNTL realiza operasaun ida boot tebes iha teritoriu Timor-Leste nian. Polisia sai uma tama uma, iha bairu no suku sosializa rezolusaun ida ne'e ba comunidade sira ne'ebé invove iha arte marsial hodi koopera ho autoridade polisia entrega atribut arte marsial nian.

Maske atividade grupu arte marsial taka ona maibe konflitu no violencia kontinua akontese signifika solusaun sira ne'ebé iha la refleta ba situasaun siguransa nian. Grupu joven sira

¹⁹ Fundasaun Mahein (FM) nia monitorizasaun ba forma sira ne'ebé akontese iha comunidade no iha media sosial hanesan facebook ne'ebé pública husi pesoal balu ho identidade falsu husi tinan 2010 to'o 2013.

²⁰ Fundasaun Mahein (FM) nia monitorizasaun iha media sosial sira no preokupasaun sira iha comunidade nia leet kona-bá video ne'ebé espalla iha tinan 2011.

²¹ Timor Post. Kinta, 21 Marsu 2011.

ne'ebé antes ne'e fahe ba grupu oin-oin, krime organizadu rekruta fila fali sira hodi involve iha violensia. Ida ne'e hatudu iha kauza fundamental ida ne'ebé sei hakesi hela iha violensia ne'ebé la iha rohan.

Tinan klaran 2013 grupu organizadu seluk lansa forma seluk iha komidade liu husi operasaun iha fatin públiku sira hanesan tasi ibun no jardim sira. Ezemplu, kazu traumatiku ida ne'ebé akontese iha area João Paulo Tasi-Tolu nian, iha grupu balu asaltu joven ida ho nia namorada no obriga sira halo relasaun seksual no grupu ne'e hasai filmajem no fotografia, ikus pública iha media sosial sira.²² Iha tinan ne'ebé hanesan ho forma ne'ebé hanesan kaer joven feto ida hatama iha taxi laran halo relasaun seksual wainhira vitima ho nia namoradu tur iha tasi ibun Pantai Kelapa – Dili nian.²³ Iha insidenti ne'e operasaun PNTL la'o maka'as tebes maibe la kleur deit.

Liu deit semana hirak nia laran mosu insidenti ida grave tebes iha kapital Dili, halo komidade pániku. Kauza husi insidenti ne'e grupu joven ida hemu tua hamutuk ho droga iha bairu Lurumata – Dili, organizadamente lasu ho droga husi pesoal seluk iha grupu ne'e no fasilita ho motor hodi sadik malu ba oho ema²⁴ ne'ebé akontese iha loron 24 Setembru 2013 lansa husi Kampung Alor, Marconi to'o Fatuhada rezulta tá joven ida mate no na'in rua seluk kanek todan.²⁵

Observasaun FM nian ba operasaun PNTL iha terenu hafoin insidenti ne'e PNTL operasaun ne'ebé rigoroju iha estrada públiku sira kapital Dili nian ho postura volume operasaun PNTL nian boot tebes. Polisia halo operasaun maka'as hela iha kapital Dili, mosu boatus balu ne'ebé espalla halo komidade pániku. Rumoris ne'ebé espalla iha kalan 27 Setembru 2013 maka insidenti ida iha Comoro sona “madre” ida iha Timor Plaza nia oin.²⁶ Ida ne'e hatudu instituisaun siguransa la iha ona kapasidade atu kontrola ordem pública nian no fo espasu ba ema ne'ebé espalla informasaun falsu hodi hatauk komidade. Lolos autoridade siguransa mantein komunikaun ida efetivu ba komidade no informa situasaun siguransa ne'ebé kredivel. Maibe buat hirak ne'e hotu falla no ema iresponsabilidade sira maka kontrola fali informasaun siguransa hodi espalla informasaun falsu iha komidade.

Iha ambitu seluk, fursionamentu liña emergjensia 112 la fursiona normal no utiliza sala husi komidade no fontes informasaun balu ne'ebé FM asesu husi pesoal PNTL sira katak dalaruma elementu PNTL balu utiliza lina ida ne'e hodi kontaktu nia kolega no familia. Ikus buat ne'ebé akontese atuasaun PNTL sempre tarde tanba liña emergjensia okupadu no lakon kontaktu husi komidade ba polisia.

Iha kazu sira ne'ebé akontese liu dadauk, sosiedade tomak hatudu ba PNTL tanba la iha operasaun ba prevensaun violensia nian no operasaun sira ne'ebé durante ne'e akontese hanesan buat hakfodak ida. Maibe presiza Estadu nia suporta ba PNTL, FM nia observasaun hatudu PNTL serbisu iha limitasaun nia laran maibe ita hotu obriga polisia tenki serbisu ho

²² Timor Post. Tersa, 06 Agustu 2013

²³ Timor Post. Kuarta, 04 Setembru 2013

²⁴ A. C (2013). Entrevista Pesoal. Dili

²⁵ Timor Post. Kuarta, 25 Setembru 2013

²⁶ Observasaun Fundasaun Mahein (FM). Sesta, 27 Setembru 2013

profesional. Iha inisiativa Komandu PNTL no distrital sira hanesan implementa polisia komunitaria liu husi hari'i Konsellu Polisiamentu Komunitaria (KPK) no Siguransa Voluntariu (SV) iha distritu sira ne'ebé involve lider komunitaria sira, joven feto no mane no lia na'in sira hanesan forsa siguransa ida ba prevensaun konfliktu nian. Maibe la iha suporta política no orsamentu husi Governu ba inisiativa hirak ne'e.

Asuntu seluk observasaun husi Diariu Timor Post hare katak operasaun husi serbisu intelejensia nian minimu tebes. Refere ba kazu 24 Setembru 2013 ne'ebé hamate joven ida no na'in rua kanek, deskreve:

"Intelejen halo kna'ar masimu karik la presiza ema tenki mate maka kaptura suspeitu, kapturasaun halo tiha ona desde suspeitu sira halo planu atu oho ema, Dili kapital Nasaun ne'ebé ki'ik, tuir lolos kriminozu sira nia fatin fasil detekta. Nune'e mos intelejensia sira hatudu an malorek".²⁷

Observasaun simples ida maibe reflata tebes ba situasaun serbisu intelejensia nian??

2. Seidauk iha lei hodi regulariza públikasaun hanesan pornografia

Sei dezenvolve????

Solusaun: reazen ka prevene?

Justifika iha situasaun ne'e polisia kaer ona suspeitu sira. Maibe, solusaun la'os deit atu lori suspeitu ba tribunal. Solusaun atu ita hahu hanoin katak Timor-Leste presiza atu halo estudu ida kle'an, estudu sosial ida ne'ebé bele liga ho kriminolojia atu bele hasai konkluzo ba krime todan no violentu sira be komesa akontese iha Dili, krime sira ne'ebé nia autor ka suspeitu mesak joven deit. Ne'e hatudu ba ita katak buat ruma la'o naksalak iha moris loro-loron joven balu sira nian karik.²⁸

FM nia observasaun insidenti hotu-hotu ne'ebé durante ne'e akontese intervensaun autoridade siguransa sempre ho operasaun no deklarasaun sira husi Komandu Jeral PNTL hasoru situasaun violensia sira iha kapital Dili no distritu liu husi media nasional sira ho deklarasaun ne'ebé makas (nu'udar ezemplu violensia ne'ebé akontese Komandu PNTL sei hasoru ho violensia). Maibe deklarasaun no operasaun sira ne'e la hatudu nia rezultadu diak ba situasaun siguransa. Ironiku liu tan, intervensaun PNTL ba prevensaun konfliktu no violensia sempre tarde, número vitima kontinua ás.

Tanba ne'e ita labele reazen deit hasoru situasaun maibe presiza buka solusaun ida preventivu no buka hatene problema lolos joven sira nian saida iha situasaun sosial no ekonomiku nian. FM nia observasaun komunidadade sira, joven no estudante universitariu sira diskusaun maka'as iha sira nia familia, bairu no estuda fatin kona-bá dezenvolvimentu ida ne'ebé la'o dadauk, mosu lamentasaun oin-oin husi grupu sira ne'e. Grupu komunidadade sira kestiona Timor-Leste fakar osan barak ona ba nia dezenvolvimentu maibe la hatudu rezultadu ne'ebé signifikante,

²⁷ Timor Post. Editorial. Sesta, 27 Setembru 2013

²⁸ Observasaun Dr. Mari Alkatiri nian ne'ebé pública iha parede facebook kona-bá akontesementu 24 Setembru 2013 ba situasaun sona malu iha kapital Dili.

orsamentu jeral estadu kada tinan aumenta maka'as maibe investimentu lahatudu rezultadu ne'ebé bele kria empregu ba joven sira. Hetok at liu tan kiak ne'ebé aumenta²⁹ no número dezempregu sa'e maka'as.³⁰ Atu dehan katak diskusaun sira ne'e bele los ka sala maibe ida ne'e realidade ida hanesan naha todan, Estadu presiza buka dalan rezolve.

Rezolve ho integradu presiza involve entidade hotu Estadu nian, problema la'os deit konflitu no violencia ne'ebé akontese iha comunidade nune'e reazen ho forsa polisia atu kombat. Maibe presiza buka solusaun ida ne'ebé prevene konflitu no violencia, la'os autoridade siguransa nia responsabilidade deit maibe entidade tomak nia responsabilidade hotu.

Durante ne'e Timor-Leste iha ona instituisaun barak serbisu iha prevensaun konflitu nian maibe esforsu sira ne'e lahatudu pasu avansu ida, violencia kontinua aumenta, grupu krime oranizadu rekruta joven sira involve iha droga no violencia. Kazu 24 Setembru 2013 hanesan lisaun importante ida ne'ebé involve joven sira idade eskola maibe ikus monu ba krime tanba droga. Inklui kazu asaltu no violencia seksual sira iha kapital Dili no grupu joven balu obriga joven seluk halo relasaun seksual depois hasai filmajen.

FM nia hare tentativa sei mosu violencia ne'ebé boot portantu kazu sira ne'ebé liu dadauk grupu krime organizadu rekruta ema ho número ne'ebé boot no involve joven barak iha iha droga, asaltu, violencia seksual to'o oho malu. Ida ne'e presiza solusaun ida lalais no preventivu. Tanba kiak, dezempregu no inflasaun ekonomia ida ne'ebé sa'e maka'as, fasil tebes krime organizadu rekruta joven sira. Portantu sira labele ona atu kompete iha merkadu traballu tanba la iha kriasaun empregu no seluk-seluk tan.

Sumariu Rekomendasau

FM Nia Rekomendasau

1. Rekomenda ba

²⁹ Radio Liberdade Online (2013). Kiak iha Timor-Leste sa'e ba 49 %. Dili.

<http://radioliberalidadedili.com/notisia/1103-kiak-iha-tl-sa-e-ba-49> Asesu iha lora 28 Setembru 2013

³⁰ Timor Post Online (2013). Governu La Redus Dezempregu. Dili. <http://www.diariutimorpost.tl/berita-553-governu-la-redus-dezempregu.html> Asesu iha lora 28 Setembru 2013.

Bibliografia

Dokumentu

Fundasaun Mahein (2013). Krime Organizadu: Rekrutamentu Ba Ema Sivil Ho Numeiru Boot. Dili <http://www.fundasaunmahein.org/2013/08/15/organized-crime-increases-civilian-recruitment/>

Mahein Nia Lian Nú. 14, (10 Novembru 2010). Operasaun Krime Organizadu iha Timor-Leste. Dili

Intervista

A. C (2013, 26 Setembru). Intervista Pesoal

B. J (2013). Intervista Pesoal. Dili

Fundasaun Mahein (FM) nia monitorizasaun ba forma sira ne'ebé akontese iha comunidade no iha media sosial hanesan facebook ne'ebé públika husi pesoal balu ho identidade falsu husi tinan 2010 to'o 2013.

Fundasaun Mahein (FM) nia monitorizasaun iha media sosial sira no preokupasaun sira iha comunidade nia leet kona-bá video ne'ebé espalla iha tinan 2011.

M. L (2013). Intervista Pesoal. Dili

P. Z (2013). Intervista Pesoal. Dili

Jornal

Diariu Nasional. Kuarta, 25 Setembru 2013.

Suara Timor Lorosa'e – STL. Tersa, 06 Agustu 2013

Timor Post. Kuarta, 04 Setembru 2013

Timor Post. Tersa, 06 Agustu 2013.

Timor Post. (2013). Atividade prostituisaun buras, lei pornografia seidak sai preoridade. Dili

Timor Post. (2013). Violensia seksual ás iha Timor-Leste. Dili

Timor Post. Kinta, 21 Marsu 2011.

